

neri possunt et copulativis et determinativis et tatpurushis et possessivis compositis; postrema rectius *relativa* dixeris; nam ratio eorum saepius in relatione, quam in possessione cernitur; qua de re infra dicam. Membra autem appello compositi partes, quae locum sibi proprium occupant, si in enunciationem legitimam convertitur totum compositum; quod semper et fieri potest et debet, atque ab indigenis grammaticis factitatur. Composita hinc dixerim *enunciativa*. Cuius generis est, si h. l. dicimus: ललितलवङ्गलतापरिश्रीलनेन कोमलो (भवति) मलयसमीरः । Verbum substantivum inserui, quod ut constat cogitatione plerumque subaudiunt Indi. Enunciatio haec: Malayensis ventus suaveolens fit frequentatione Garyophyllorum, contrahi potest in unum compositum enunciativum, omissis inflexionibus et copula. Compendiato autem hunc in modum sermone, diversa poni potest ratio subiecti; si in eo subsistitur et enunciatio de eo praedicatur, praecedentia i. e. praedicatum cum accessoriis suis, adiectivum constituent cum subiecto more *determinativi* coniungendum. Sic habebis: ललित- कोमलमलयसमीरः i. e. ललित- कोमलो यो मलयसमीरः । frequentatione Garyophyllorum suaveolentem ventum Malayensem. Relatio praedicati est ad subiectum enunciationis. Sin autem aliud ponitur extra enunciationem subiectum, ad quod et subiectum et praedicatum enunciativi compositi simul refertur, evadit compositum possessivum, vel ut malo, relativum, siquidem in sola relatione discrimen est positum. Uti quum in nostro exemplo referatur ventus cum praedicato suo ad vernum tempus, tanquam attributum. Enunciativa haec composita itaque Karmadhâraya sunt, si id, de quo praedicatur, ultimum vocabulum, subiectum enunciationis est; Bahuvrîhi sunt, si id, de quo praedicatur, extra enunciationem positum est et ad id refertur subiectum enunciationis.

*Tria* igitur sunt, quae in hisce compositis enucleandis fieri debent: primum, ut *membra* invenias totius corporis; secundum, ut singula membra, si ipsa sunt composita, dissolvas et ad classes suas referas; tertium, ut membrorum vices in enunciatione definias. Restat, ut indages, utrum de subiecto enunciationis praedicetur praedicatum, an subiectum una cum praedicatis suis alii notioni attribuatur; quod tam de simplicibus Kamadhârayis, Bahuvrihibus et Tatpurushis, quam de hisce enunciativis valet. Haec eo consilio adumbravi, ut videant hisce vocabulorum miraculis minus assueti ea tractari, et posse et deberi grammatica